

Uunga siunnersuut: Suliniutit annertuut sanaartornerisa nalaanni nunanit allamiut najugaqalernissamut sulinissamullu akuerineqarsinnaanerit pillugu Kalaallit Nunaannut Inatsisip Kalaallit Nunaannut atuutilernissaa pillugu oqaaseqaateqarnissamut Inatsisartut aalajangiinissaanut siunnersuut.

Saqqummiussissut

(Inuussutissarsiornermut Aatsitassaqaarnermullu Naalakkersuisoq)

Siullermeenera

2013-imi ukiakkut ataatsimiinnerminni Inatsisartut Suliniutini angisuuni illuliortiternernik sanaartornernillu suliassat pillugit Inatsisartut inatsisaat nr. 25, 18. december 2012-imeersup allangortinnissaa taasinermi 26-usut akuersissutigaa. Inatsisissatut siunnersuutip oqaaseqarfiginissaa pillugu aalajangiinissamut siunnersuut manna suliniutinut angisuunut inatsisip malitsigisaatut saqqummiunneqarpoq, tassaallunilu suliniutinut angisuunut inatsisiliornermi suliaqaarnerup naggatigisaa.

Nunanit allamiunik killeqarfinnillu nakkutilliinerit, ilanngullugit najugaqalernissamut sulinissamullu akuersissutit pillugit malittarisassiat tassaapput suliassaqaarfiit Namminersorlutik Oqartussat suli tigusimanngisaat, taamaattumillu naalagaaffiup ataaniittuullutik. Tamanna tunngavigalugu pisariaqartinneqarsimavoq suliniummi angisuumi sanaartornerup nalaanut atatillugu nunanut allamiut Kalaallit Nunaanni najugaqarnissaannut sulinissaannullu akuersissuteqarnissamik nalunaaruteqartoqarsinnaanissaanut naalagaaffimmi inatsisiliornikkut immikkut ittumik najoqqutassiortoqassasoq.

Siunnersuut pillugu naalagaaffiup aamma Naalakkersuisut akornanni qanimut oqaloqateqartoqarsimavoq, ilanngullugu aatsitassat qaqutigoortut pillugit apeqqummut tunngatillugu. Oqaloqatigiinnikkut tassuuna maannakkut Folketingimi ataatsimiinnermi inatsisissatut siunnersuutip saqqummiunnissaa pillugu Naalakkersuisut kissaatigisaata akuersaartinnissaa iluatsissimavoq.

Inatsisissatut siunnersuummi allassimavoq aatsitassat qaqutigoortut pillugit apeqqut namminersorlutik oqartussat inatsisiliorlutillu inatsisinik atuutsitsisuuffigisaannik aatsitassanik suliassaqaarfirmi namminersorlutik oqartussat naalagaaffimmilu oqartussat akornanni piginnaasaqassutsinik agguataarinermik atuuttumik allannguisuunngitsoq.

Nunanit allanit aningaasaliisartunik aggersaasinnaasunik sinaakktissatut piumasaqaatit pilersinnissaat pillugit Naalackersuisut aamma naalagaaffiup isumaqatigiissuteqarnerannik inatsisissatut siunnersuutip akuersissutiginera nunarsuarmut avatangiisumut nalunaarutaassaaq.

Inuussutissarsiutitigut suliniutinik ingerlassaqarsinnaanermut sinaakktissatut piumasaqaataasunik siunnersuut pitsanngorsaavoq. Kalaallit Nunaannut suliffiit nutaat isertitallu pillugit kissaatigisamik naapitsiniarluni anguniagaqarluta suliaqarnerput pillugu innuttaasunut tamanna erseqqissumik nalunaarutaassaaq.

Taamatut oqaaseqarlunga siunnersuut Inatsisartuni akuersaartumik oqaluuserinissaanut ingerlateqqippara.